

Uunga siunnersuut: Isumaginnittoqarfiup aqunneqarnera aqqissuussaaneralu pillugit Inatsisartut peqqussutaata allanngortinneqarnissaa pillugu Inatsisartut inatsisaat nr. xx yy 2017-imeersoq. (Isumaginninnermi Naammagittaalliuuteqartarfiup sulianik ingerlatsinerata naammassiuminarsagaanera)

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisumit saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Mala Høy Kuko, Siumut
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Peter Olsen, sinniisussaq, Inuit Ataqtigiit
Inatsisartunut ilaasortaq Bendt B. Kristiansen, Inuit Ataqtigiit

UPA 2017-imi ulloq 2. oktober 2017-imi siullermeerinerup kingorna ataatsimiititaliap siunnersuut sukumiisumik misissorpaa.

1. Siunnersuutip imarisaa siunertaalu

Inatsisissatut siunnersuut Atuisartunut Unammilleqatigiinermullu Aqutsisoqarfiup misissuinerisa arlallit malitsigaat, Isumaginninnermi Naammagittaalliuuteqartarfiup atuunneranut tunngatillugu inatsisip iluarsineqarnissaanut tunngavissaqalersitsisoq.

Isumaginninnermut Naammagittaalliuuteqartarfiup sullissinerani periutsit assigiissaarneqarnissaat siunnersuummi siunertarineqarpoq, taamaaliornikkut sullissinnermi piffissaq atorneqartartoq sivikillisinneqarsinnaaqqullugu, kiisalu innuttaasut inatsisitigut illersugaanerat pitsaanerulersinnaaqqullugu.

Tamanna anguneqarsinnaavoq naammagittaalliuuteqarnissamut piffissarititaasup sapaatip akunnerinik sisamaniit sapaatip akunnerinut arfinilinnut sivitsorneqarneratigut,

naammagittaalliuuteqartup Isumaginninnermi Naammagittaalliuuteqartarfimmut saaffiginninnermini ilusiliinissamut piumasqaatit ilanngunneqarnerisigut, Naammagittaalliuuteqartarfiup ilaasortai tallimaniit pingasunut ikilisinnerisigut matumani ilaasortat piginnaasaasa qaffanneqarnerisigut, suliat pillugit ilaasortat allakkatigut taasisinnaalernissaannik periarfissanik atuutilersitsinikkut, kiisalu Isumaginninnermut Naammagittaalliuuteqartarfiup siulittaasuata aalajangiinissamut pisinnaatitaaffiisa annertusineqarnerisigut, taamaaliornikkut suliassanut nalinginnaasunut siulittaasoq kisimiilluni aalajangiisnaalersinnaaqullugu.

2. Naqqiut

Siunnersuummut tamarmut atatillugu naqqiutininik marlunnik nassiussisoqarpoq. Inatsisissatut siunnersuut inatsisissamullu nassuiaatit 16. august 2017-imi siullermik saqqummiunneqarput, tamatuma kingorna 21. september 2017-imi naqqiissuteqartoqarluni, kiisalu 28. september 2017-imi aappasaanik naqqiissuteqartoqarluni, tassa ulloq 2. Oktober 2017-imi siunnersuummik siullermeerinissaq ullualunnik sioqqullugu.

28. september 2017-imi aappassaa naqqiissutigineqartoq Inatsisartuni siullermeerinermiit aallaaveqarpoq.

3. Siunnersuutip Inatsisartunit siullermeerneqarnera

Isumaginninnermut Naammagittaalliuuteqartarfimmi sullissinerup pitsanngorsarneqarnissaa pillugu inatsisissatut siunnersuummi siunertarineqartoq Inatsisartuni siullermeerinermi tapersorsorluarneqarpoq, matumani pingaartumik Naammagittaalliuuteqartarfiup sullissinnermini piffissaq atortagaa eqqarsaatigalugu.

Siunnersuutip sularilinninnerani tusarnermi illuatungerisat piffissaalluartillugu tusarniarneqartarnissaat kissaatigineqarpoq, naak tusarniaanermi illuatungerisat, matumani pingaartumik kommunit, tamarmik immikkut tusarniaanissamut piffissarititap qaangiunnerani tusarniaanermut akissuteqarsimanngikkaluarpataluunniit.

Kommunini suliat ingerlanneqartarnerinut tunngatillugu siunnersuutip kingunerisassai pillugit apeqquteqaammut akissuteqaammuni inatsisissatut siunnersuut kommuninut annertunerusumik suliakkersuutaanaviangitsoq Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq akissuteqarpoq. Tamatuma saniatigut tusarniaanermut killissarititaasup naanerata kingorna KANUKOKA nassitsisimasoq tusarniaanermilu akissutigineqartoq Inatsisartut Ilaqutariinnermut Peqqissutsimullu Ataatsimiititaliaanut ingerlateqqinneqassasoq taamaalilluni suliamei KANUKOKA-p isuaa tusaaneqarsinnaaniassammat Naalakkersuisup erseqqissaatigaa.

Pingaartumik Siumup oqaaseqaataani Isumaginninnermut Naammagittaalliuuteqartarfimmut tunngatillugu Naammagittaalliuuteqartarfiullu siulittaasuata piginnaasai isornartoqartitsipput.

Pineqartumi allannguutit inuiaqatigiinni pissutsinut pisariaqartitanullu naleqqussarneqartariaqartut Siumup oqaatigaa.

Immikkoortunut aalajangersimasunut Isumaginninnermut Naammagittaalliuuteqartarfiup tusarniaanermi akissuteqaataani siunnersuummut isornartoqartitsinera Demokratit oqaaseqaatiminni maluginiarpaat.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami sukumiinerusumik suliarineqartussanngorlugu innersuunneqarpoq.

4. Tusarniaanermi akissuteqaatit

Tusarniaanermi akissutigineqartut inatsisissatut siunnersuummik ilaqartinneqarput, taamaattumik Inatsisartut Siulittaasoqarfiata ilusiliinissamut piumasqaataanut naapertuulluni.

Tusarniaanerup ingerlanerani Namminersorlutik Oqartussat tusarniaanernut nittartagaanni tusarniaassutigineqarnerata saniatigut siunnersuut piffissami 22. juni 14. august 2017-imut tusarniaassutigineqarpoq.

Tusarniaaneq sapaatit akunnerinik sisamanik sivisussuseqarpoq, tamanna naleqquttutut isumaqarfingineqarpoq, naatsorsuutigineqartumillu periusineqartumut naapertuulluni. Tusarniaanerli aasaanerani sulinngiffeqarnerup nalaani ingerlanneqarpoq. Periusineqartoq tamanna ataatsimiititaliamit isornartoqartinneqarpoq, aasaanerani sulinngiffeqarnermi sulisoqarnikkut unammillerfiusinnaasumi tusarniaavigineqartumut tusarniaanermi tunniussivissamut piffissarititaasoq tulluuntuunngimmat.

Naalakkersuisut siunnersuummik tusarniaanermi aasaanerani sulinngiffeqartarneq eqqumaffigisassagaat ataatsimiititaliamit Naalakkersuisut kaammattorneqarput.

5. Ataatsimiinnerit

Ataatsimiititaliap siunnersuummik qulaajaassutaasumik suliaqarnerminut atatillugu Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut Naalakkersuisoq ulloq 9. oktober 2017-imi ataatsimiititaliamit ataatsimeeqatigineqarpoq.

Ulloq 24. oktober 2017-imi isumaginninnermut naammagittaalliuuteqartarfimmi siulittaasoq ataatsimiititaliamit ataatsimeeqatigineqarpoq.

6. Ataatsimiititaliap siunnersuummik suliarinninnera

Tusarniaanermi piffissap naanerata kingorna KANUKOKA-miit tusarniaanermut akissuteqaammik 4. oktober 2017-imi allakkatigut ataatsimiititaliaq tigusaqarpoq. Aammattaaq KANUKOKA-p tusarniaanermi akissuteqaataanut Naalakkersuisut

oqaaseqaataannik, aammalu ulloq 2. oktober 2017-imi siullermeerinermi apeqqutigineqartunut akissuteqaatinik 4. oktober 2017-imi alakkat ilaqarput.

4. oktober 2017-imi ataatsimiititaliamut allakkat isumaliutissiisummut matumunnga **ilannugssaq 1**-itut ilanngunneqarput.

Isumaginnittoqarfiup aqunneqarnera aaqqissugaaneralu kingullermik Inatsisartut inatsisaat nr. 14, 6. juni 2016-imi allanngortinneqartoq pillugu Inatsisartut peqqussutaata nr. 11, 12. november 2001-imeersup allanngortinneqarnissaanik siunnersuut saqqummiunneqartumut tunngassuteqartoq ataatsimiititaliamit maluginiarneqarpoq.

Isumaginninnermut Naammagittaalliuuteqartarfiup siviluallaamik sullissisarnera innuttaasunut naammagittaalliuuteqartartunut sunniuteqartartoq ataatsimiititaliamit annertuumik ernumanartoqartinneqarpoq.

Sullissinerup sivilusarnera innuttaasunut siullermeerutaasumik kukkusumik ilaannakortumilluunniit aalajangiinermik nalaataqarsimasunut nalaataqarsimasinnaasunulluunniit inatsisitigut illersugaaneq inatsisitigullu illersugaasutut misigisimaneq eqqarsaatigalugit assuarnarpoq.

Pisortanit ikiorsiissutit, siusinaartumik pensionisiat utoqqalinersialluunniit pillugit aalajangiinerit pillugit kommunit allagaatinik Isumaginninnermut Naammagittaalliuuteqartarfik agguaqatigiissillugu ulluni 140-150-ini pissarsiniartarnera paasillugu ernumanartorujussuurtut ataatsimiititaliamit isumaqarfigineqarpoq. Suliat kommunit aalajangiiffigisaannut innuttaasunut naammagittaalliuuteqarnissamut pissutissaqartut eqqarsaatigalugit akuersarneqarsinnaanngilaq, pingaartumillu suliat nassiunneqartarnerat ajornannginnerulernikuunera eqqarsaatigalugu, ukiuni nutaajunerusuni piffissap sivikitsunnguup ingerlanerinnaani nassiunneqarsinnaagaluardata. Isumaginninnermut Naammagittaalliuuteqartarfimmi namminerimi, ataatsimiititaliap paasinninnera naapertorlugu siunnersuummut nalinginnaasumik nassuiaatini, agguaqatigiissillugu qaammatini 16-ini sullissineq sivilususeqartartoq atuarneqarsinnaavoq. Tamanna namminerimi sullissinnermut piffissaq atorneqartartoq eqqarsarnartoqarpoq, malunnaatilimmik sivikinnerulernissaa anguniarlugu sulisoqartariaqarpoq.

Isumaginninnikkut Naammagittaalliuuteqartarfimmi 795-inik suliassarpassuaqartoq ataatsimiititaliamit maluginiarneqarpoq, suliassat amerlapput.

Taakkuinnaalluunniit eqqarsaatigalugit Isumaginninnermut Naammagittaalliuuteqartarfimmi sullissinerup pisariillisarneqarnissaa pisariaqarluinnarpoq, taamaaliornikkut innuttaasut inatsisitigut illersugaanerat nukittorsarneqarsinaaqqullugu aaqqissuussinermullu taamaattumut tatiginnilersinnaaqqullugit.

Kommuniniit allagaatinik pissarsiniarnissaq siunertaralugu kommunit allagaatinik Isumaginninnermut Naammagittaalliuuteqartarfimmu nassiussinissaannut sapaatit akunneri sisamat angullugit piffissaliisoqarnissaa ataatsimiititaliamit tapersersorneqarpoq. Piffissarititaasoq KANUKOKA-mit taperserneqartoq ataatsimiititaliap maluginiarpaa. Sapaatit akunnerinut arfineq pingasunut sivitsorneqarnissaa Kommuneqarfik Sermersuumiit kissaatiginartinneqaralarpoq. Taamaattoq matumani piffissaliunneqarsimasoq eqqortinneqanngippat tunngavigineqartut aallaavigalugit Isumaginninnermut Naammagittaalliuuteqartarfik aalajangiinissaanut periarfissinneqarnissaa pillugu naatsorsuutigisaqarneq aallaavigineqassalluni. Naalakkersuit allakkiaanni 4. Oktober 2017-imeersumi **ilannugssaq 1**, aalajangiineq sulianik ingerlatsinermut inatsimmi piumasagaatinik naammassinninngitsoq nutaamik suliassanngorlugu utertinneqarsinnaasoq, taamaalilluni suliamik ingerlatsinermut inatsimmi malittarisassat malinneqarnerat isumannaarneqarluni.

Sapaatip akunnerinik sisamanik piffissaliineq kommuninit amerlanngitsunik eqqortinneqarsinnaatinnagu tunngaviit pigineqartut aallaavigalugit Isumaginninnermut Naammagittaalliuuteqartarfik aalajangiineq ajortoq, akerlianilli Nakkutilliisoqarfimmu kommuninut piaartumik qisuariaqqusisoqartoq allagaatinillu pisariaqartinneqartunik pissarsiariumaneqartunik nassitseqquneqartut ataatsimiititaliamit maluginiarneqarpoq. Naalakkersuisut 4. oktober 2017-imi allagaanni, **Ilannugssaq 1**, erseqqissarneqarpoq, aalajangiineq, pisortat ingerlatsineranni suliassat suliarineqartarnerat pillugu Inatsimmi piumasarineqartut naammassineqarsimannngippata nutaamik suliarineqartussanngorlugit utertinneqassasut, taamaalilluni pisortat ingerlatsineranni suliassat suliarineqartarnerat pillugu Inatsimmi maleruagassat eqqortinneqarnissaat qulakkeerneqarsinnaaniassammat.

Isumaginninnermut Naammagittaalliuuteqartarfiup katitigaanera

Isumaginninnermut Naammagittaalliuuteqartarfiup katitigaanerani ilasortarisai tallimaniit pingasunut ikilisinneqarnissaat siunnersuummi pingaartinneqarpoq. Isumaginninnermut Naammagittaalliuuteqartarfik ataatsimik siulittaasoqassasoq marlunnillu ilaasortaqaarnissaa siunnersuutigineqarpoq. Siulittaasoq inatsisilerinermi kandidatitut ilinniakkamik naammassinnissimasuussaaq Isumaginninnermullu Naammagittaalliuuteqartarfiup allaffeqarfiani Naammagittaalliuuteqartarfimmi pisortatut atorfinitsinneqassalluni. Naammagittaalliuuteqartarfiup ilaasortaasa sinneri marluusut eqqarsaatigalugit, ilaasortaqa ataseq sinniisussaalu isumaginninnermut tunngasuni sulianik ilisimasaqartuussapput ilaasortallu aappaa sinniisussaalu isumaginninnikkut tunngasuni inatsisilerituutut ilinniagaqarsimanissaa siunnersuutigineqarpoq.

Isumaginninnermut Naammagittaalliuuteqartarfiup aaqqissuunneqarnissaanik siunnersuummi tapersersuinissaq nunatsinnilu isumaginninnikkut tunngasuni sullissinerup piginnaasaqarnikkut pisariillisaasoqarnissanullu qulakkeerisuussaaq.

Isumaginninnermut Naammagittaalliuuteqartarfiup katitigaanera pingaartumillu siulittaasup piginnaasaqarnissaanik piunasaqaataasoq siunnersuummik siullermeerinermi Siumumiit annertuumik nangaanartoqartinneqarpoq, taamaattumik tamanna ataatsimiititaliami immikkut eqqartorluarneqarlunilu suliarineqarpoq. Pingaartumik paatsuugassaangitsumik Isumaginninnermut Naammagittaalliuuteqartarfiup siulittaasua inatsisilerinermi kandidatitut ilinniagaqarsimasuunissaa Siumumiit isornartoqartinneqarpoq, maleruagassanili atuuttuni siulittaasoq nunatsinni isumaginninnikkut ilisimasaqarluarnissaa naammakkaluartoq oqaatigalugu.

Siunnersuutip ilaa ataatsimiititaliamit sukumiisumik nalilersorneqareerluni Isumaginninnermut Naammagittaalliuuteqartarfiup aaqqissuussaana nutaaq ataatsimiititaliamit tapersorneqarpoq.

Isumaginninnermut Naammagittaalliuuteqartarfik nutserisoqarnikkut maannakkut qulakkeerunneqarsimanera siunnersuummut nalinginnaasumik oqaaseqaatini qulakkeerunneqarsimammat ataatsimiititaliamit maluginiarneqarpoq, taamaaliornikkut innuttaasut oqaasii atorlugit aalajangiisoqarsinnaaqqullugu matumani suliat suliarineqarnerannut malunnaatilimmik sunniuteqanngikkaluartumik.

Taamaattoq ataatsimiititaliap erseqqissaatigissavaa Isumaginninnermut Naammagittaalliuuteqartarfiup sulinerata tapersorneqarnissaanut nukiit pisariaqartinneqartut malunnaatilimmik annertusineqarnissaat isumaqarfigineqarpoq. Suliassanik isumaginnissinnaasut pisariaqartinneqartumik amerlassusilerneqarnissaasa minnerunngitsumillu nutserisoqarnikkut qulakkeerisoqarnissaa pisariaqartinneqarpoq, taamaaliornikkut taamatut kissaateqarneq sivikinnerusumik sulianik isumaginninnissamik ataatsimut kissaatigineqartoq qulakkeerunneqarsinnaaqqullugu.

Siunnersuummik siullermeerinermi Demokraatit oqaaseqaataanni erseqqissarneqarpoq, tusarniaanermi akissuteqaatini Isumaginninnermut Naammagittaalliuuteqartarfimmeersumi siunnersuummut tunngatillugu arlalitsigut isornartoqartitsisoqartoq. Siunnersutip ilusimisut iluseqartup Isumaginninnermut Naammagittaalliuuteqartarfiup isornartoqartitai ataatsimiititaliamit pitsaasumik isummorsorfigineqarput.

Isumaginninnermut Naammagittaalliuuteqartarfimmi ingerlatsineq siunnersuutip matuma pisariillisissinnaagaa Naalakkersuisut assigalugit ataatsimiititaliamit upperineqarpoq. Ataatsimiititaliap paasinninnera naapertorlugi naammagittaalliuuterpassuarnut tunngatillugu Isumaginninnermut Naammagittaalliuuteqartarfimmi sukkanerusumik pisariinnerusumillu suliarineqartarsinnaagaluarput. Suliassat amerlasuut allaffimmiumit suliarineqarsinnaagaluarput tunngaviusumilluunniit inatsisilerinikkut pisariitsumik suliassaanatik. Naammagittaalliuutigisaq imarisamigut aalajangiinnermillu

allanngortitsinissamut sukkanerusumik pisariinnerusumillu qulaajaasoqarsinnaalernissaa naammagittaalliuuteqartunut annertuumik sunniuteqartussaavoq.

Kommunit allagaatinik nassitsinissaannut piffissarititassatut siunnersuutigineqartumut tunngatillugu isumaginninnermut tunngasuni sullissisarnermut tunngatillugu unammilligassaqaareersoq tusarniaanermi akissuteqaammi Isumaginninnermut Naammagittaalliortarfimmeersumit oqaatigineqarpoq.

Innuttaasut sullinneqarnerisa qaffassarneqarnissaanut kommunit oqartussallu allat piумаaffigineqartariaqartut ataatsimiititaliamit tapersersorneqarpoq. Immikkut naammassinninnissamut, sullissinissamut assigiissaarisooqarnissaanillu piumasaaqateqartoqartalerpat oqartussaasut akuusut illuatungerisallu oqaloqatigiinnermi pimoorussisariaqalissapput iluatsinnissaatalu tungaanut suleqatigiillutik ataatsimoorlutillu anguniakkanik angusaqarlutik. Taamaattumik oqartussanut piumasaaqateqartoqartillugu ataatsimiititaliaq nangaassuteqarneq ajorpoq.

Isumaginninnermut Naammagittaalliuuteqartarfiup akissuteqarnermini ernumassutigisai isornartoqartitaalu pillugit Naalakkersuisut akissuteqaataat ataatsimiititaliap tusaatissatut tiguneqarput.

Isumaginninnermut Naammagittaalliuuteqartarfiup naammagittaalliornermi immersugassat assigiissaarneqalernerisigut qarasaasiatigullu aaqqiinerit amerlanerulernerisigut ungasinnerusooq isigalugu sullissineq pisariinnerulerumaartoq ataatsimut isigalugu ataatsimiititaliamit upperineqarpoq.

Siunnersuutip 1. januar 2018-imi atuutilernissaa siunnersuutigineqarmat ataatsimiititaliamit maluginiarneqarpoq.

7. Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai siunnersuummut nalinginnaasumik oqaaseqaatini allaaserineqarput. Siunnersuut pisortanut aningaasatigut kinguneqaateqassanngitsoq allassimavoq, illuatungaatiigullu siunnersuutigineqartoq innuttaasunut annertuumik pisariillisaanermik isumaginninnermullu naammagittaalliuutinut tunngatillugu annertunerusumik inatsisitigut illersugaanermik kinguneqassaaq. Innuttaasut Isumaginninnermut Naammagittaalliuuteqartarfimmu saaffiginninniarunik annertunerusumik qarasaasiatigut aaqqiissuteqartarnissaat siunnersuutigineqartoq piumasaaqateqarpoq.

Naalakkersuisut oqaatigisaat ataatsimiititaliamit tusaatissatut tiguneqarput.

8. Inaarutaasumik oqaaseqaatigiumasat

Siunnersuummik matuminnga suliaqarnermut atatillugu innuttaasunik

kikkuugaluartunilluunniit sullissinermi piffissap atorneqartartup imaluunniit oqartussanut aallaqqaammulli saaffiginninnermi naapertuutinnngilluinnartumik aalajangiisarnerit malunnartumik appartinneqarnissaat ataatsimiititaliamit aalajangiisumik pingaartinneqarpoq.

Siunnersuummi nalilersuinermi aalajangiisuusooq tassaavoq innuttaasut inatsisitigut illersugaanerisa nukittorsarneqarnissaat.

Kingusinnerpaamik UKA 2018-imi 2019-imullu Aningaasanut Inatsisissap akuerineqannginnerani Isumaginninnermut Naammagittaalliuuteqartarfiup sulianik isumaginninnermini piffissaq atortagaata pillugu siunnersuutigineqartup sunniutaanut tunngatillugu akissuteqaammik tigusaqarnissani ataatsimiititaliap kissaatigaa.


9. Ataatsimiititaliap inassuteqaataa

Tamanna tunngavigalugu siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu oqaatigineqartutut paasinnilluni siunnersuut Ilaqutariinnermut Peqqissutsimullu ataatsimiititaliap aappassaaniigassanngortippaa.




Nivi Olsen, Siulittaasup
tullia



Laura Táunâjik,
Siulittaasoq



Jess Svane




Mala Høy Kuko



Debora Kleist



Peter Olsen



Bendt B. Kristiansen



Uunga:

Ilaqutariinnermut Peqqissutsimullu Ataatsimiititaliaq


**UKA 2017 / 19-ip, Isumaginnittoqarfiup aqunneqarnera
aaqqissuussaanelu pillugu allannguutissatut siunnersuutip,
siullermeerneqarneranik nangitsineq**

04-10-2017
Suliap nr. 2017 - 16101
Akt. id. 6317140

Isumaginnittoqarfiup aqunneqarnera aaqqissuussaanelu pillugu
allannguutissatut siunnersuutip siullermeerneqarnerani KANUKOKAp
tusarniummut akissutaata, tusarniaanermut piffissaliussap qaangernerani
nassiunneqarsimasup, kiisalu partiit oqaaseqaataanni apeqqutigineqartunut
akissutit nassiutissallugit neriorsuutigaara.

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iniiian@nanoq.gl
www.naalakkersuisut.gl

Inussiarnersumik inuulluaqqusillunga
Med venlig hilsen


Sara Olsvig

Ilanngussat:

1. KANUKOKAp tusarniaanermut akissutaa
2. KANUKOKAp tusarniaanermut akissutaanut akissutit
3. Partiit oqaaseqaataanni apeqqutinut akissutit



KANUKOKA

Kalaallit Nunaanni Kommunit Kattuffiat • De Grønlandske Kommuners Landsforening

**Isumaginninnermut, Ilaqutariinnermut,
Naligiissitaanermut Inatsisinillu Atuutsitsinnermut
Naalakkersuisoqarfik
Postbox 260
3900 Nuuk**

Ulloq/Dato: 14.08.2017
J.nr. 40.00

**Isumaginnittoqarfiup aqunneqarnera aqqissuussaanelu pillugit
Inatsisartut peqqussutaat nr. 11, 12. november 2001-imeersup
allangortinneqarnissaa pillugu Inatsisartut inatsisissaattut
siunnersuutip tusarniaassutigineranut akissut**

KANUKOKAp Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfimmit Isumaginnittoqarfiup aqunneqarnera aqqissuussaanelu pillugit Inatsisartut inatsisissaattut siunnersuut qulaani taaneqartoq tusarniaassutitut tiguaa, tusarniaanermut 14. august 2017 killiliussaalluni. Kommunit tusarniaanermut akissutaat immikkut nassiunneqarumaarput.

Oqaaseqaatit nalinginnaasut:

Inatsisartut peqqussutaata pisoqaanerusup 2001-imeersup allangortinnissaa pineqarpoq, taanna kommunit 1. 1. 2009-imi kattussunnerannut atatillugu nutarterneqarsimangilaq, taamaallaallu §§-it 8, 9, 10 aamma 11-ip ataanni Isumaginninnermi Naammagittaalliuteqartarfik pineqarluni.

Oqartussat isumaginninnermi maleruagassanik allaffissornikkut ingerlatsisut ilusiliussanut piumasaqaatinik eqqortitsinissaq siunertaralugu naammagittaalliortunik pisariaqartitamik ikiuunnissaat KANUKOKAp isumaqatigaa. Sulianilli suliarinninneq pillugu inatsimmi § 7 malillugu taamatut ittussaareerpoq.

Ilusiliussanut piumasaqaatinik, isumaginninnermi maleruagassat malillugit

aalajangiinerit naammagittaalliuutigineranni atorneqartussat pillugit maleruagassanik, ilanngullugit sulianut qanoq ittunut ilusiliussanik piumasqaatinik pineqartunik atuiiffiunissaat pillugu maleruagassanik erseqqinnerusunik aalajangersaanissamut Naalakkersuisut piginnaatinneqarput. Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersumut atatillgu naammagittaalliuuteqarnermut suliap digitalinngortinneqarnissaanut eqqarsaat qanoq inissisimassanersoq inatsimmut oqaasertaliussani nassuiaatigineqarnissaa KANUKOKAp ujjartorpaa. Innuttaasut digitalimik atuinissamut killilimmik periarfissallit eqqarsaatigalugit apeqqutip iliuuseqarfigineqarnissaa KANUKOKAp siunnersuutigaa. Innuttaasunut piumasqaateqarnissaq nalinginnaasumik ajoquteqanngilaq, taamaasillutik taakku naammagittaalliuutitik eqqornerusunik oqaasertalinissamut periarfissaqassammata.

Kommunip suliamut allagaatai naammagittaalliuuteqartarfup tigunngippagit, suliap suliarineqarfianut siullermut suliarineqaqqittussanngorlugu utertinneqarsinnaanera oqaaseqaatini nalinginnaasuni imm. 1-imi allaaserineqarpoq. § 11, imm. 3-mi aalajangersagaq attatiinnarneqassappat, taamatut periaffissap inatsimmi aalajangersakkami toqqaannartumik takuneqarsinnaasariaqartoq KANUKOKA isumaqarpoq, taamaappammi pisortat ingerlatsinerannut inatsisit malillugit aalajangiineq pineqassammat, suliamilu paasissutissat naammattut pissarsiarineqarsimanngippata, pisortat ingerlatsinerannut inatsisit tunngavigalugit inatsisitigut aalajangiigaanngitsumik aalajangiisoqarsinnaanngimmat. Tamatuma saniatigut KANUKOKAp § 11, imm. 3-tut siunnersuutigineqartumut oqaaseqaatini innersuussutigai.

Kommunit isumaginninnermi maleruagassanik ingerlatsinerannut akuliunnissamut periarfissanik assigiinngitsunik eqqussisoqarpat, aqutsinissamullu periarfissat assigiinngitsut taakku imminnut tulluarsarsimanngippata, tamanna tunngaviatigut eqqarsarnartutut inatsisiliornerullu pitsaassusiata pitsaanngitsuuneranik takutitsisutut KANUKOKAp isigaa.

Inatsimmut nalinginnaasumik oqaaseqaatini imm. 1-imi ilanngullugu oqaatigineqarpoq naammagittaalliuuteqartarfimmu naammagittaalliuutit ilusaannut piumasqaatinik aalajangersaanissamut siunnersuutip aallaqqaataaniilli paasissutissanik tunngaveqarnissaannut iluaqutaassasoq. Suliap aalajangernissaanut suliami allagaatit pisariaqartinneqartut kommunit nassiutinngippatigit, naammagittaalliuuteqartarfup kommuninut kinguneritatut illuatungaasumut iluaqutaasumik aalajangiisinnaanissaata peqatigisaanik siunnersuutigineqarneranut taamatut oqaaseqaateqarneq imaaliiallaannaq tulluurtutut isigineqalersinnaanngilaq.

Naammagittaalliuutip oqartussanut siullermik suliarineqarnerani aalajangiisunut tunniunneqarnera inatsisissatut siunnersuummut oqaaseqaatini nalinginnaasuni imm. 2.1-imi allaaserineqarpoq. KANUKOKAmi nalilersuereernikkut immikkoortoq taanna pingaaruteqartutigit

annertusineqartariaqarpoq.

Taamaasilluni pisortat ingerlatsinerannut inatsisini nalinginnaasuni imaappoq, suliassaqarfiit qaffasinnerusumut naammagittaalliugineqarsinnaasut, siullermik suliarinninnermi aalajangiisimasut suliaq qaqeqqissinnaanngilaat qaqeqqittussaanalugu, siullermillu aalajangiisoq suliami nutaamik aalajangiinissamut inatsisitigut tunngavissaqarani.

Oqaaseqaatini nalinginnaasuni imm. 2.2.1.-imi taaneqartoq naammagittaalliuteqarfik taasinerit amerlanerussuteqartut malillugit aalajangiisassasoq, taasinerilli amerlaqatigiitsillugit siulittaasup taasinerata aalajangiisusassasoq. Taasinerit amerlaqatigiitsillugit siulittaasup taasinerata aalajangiisusussaananeramik maleruagassaq taamatut ittoq pisortat ingerlatsinerannut inatsisini atuutinnigilaq, atuutissagunilu inatsisit oqaasertalernerannut aalajangersimasumik ilanngullugu allanneqassalluni.

Oqaaseqaatini nalinginnaasuni immikkoortoq 2.2.2-mi naqinnerliugaqarpoq, § 9, imm. 9 innersuussutigineqartussaagaluarmat.

Inatsisissaatut siunnersuummi aalajangersakkanut ataasiakkaanut oqaaseqaatit:

§ 8, imm. 1

Aalajangiinernut kommunit Naalackersuisullu aalajangigaannut atatillugu naammagittaalliuteqarsinnaanerup aalajangersakkamut ataatsimut kattunnerat silatusaarneruvoq, inatsiseqarnerup pisariillisarnissaa assigiissaarnissaalu siunertaammat.

§ 8, imm. 2

Naalackersuisut aalajangigaat kisiisa pinnagit kommunit aalajangigaat aalajangersakkamut ilaatinneqalermata pitsaasuvoq, tamanna annerusumik naligiissitsinerummat.

§ 8 imm. 5

Saqitsaannermik suliat tamarmik Kalaallit Nunaanni eqqartuussivimmi siullermeertumik suliarinnittutut aallartinneqartassasut eqqartuussisarneq pillugu inatsimmi atuuttumi § 57, imm. 1-imi aallaaviuvoq, kisiannili eqqartuussisarneq pillugu inatsimmi § 57, imm. 2 malillugu suliat aalajangersimasumik pissusillit ataasiakkaat kredsrettinut siullermeertumik suliarineqartussanngortinneqarsinnaallutik. Taamaattumik eqqartuussinerit meeqqat angerlarsimaffiup avataanut inissinneqarnerannut tunngasut misilinneqarnissaat kisimik eqqartuussisarneq pillugu inatsimmi maleruagassaq pingaarneq malillugu kredsrettinit siullermeerneqartussaananerata

itisilerneqarnissaa KANUKOKAp ujartorpaa.

§ 9 nalinginnaat

KANUKOKA isumaqarpoq malerugassat nutaatut
siunnersuutigineqartutigut ilumut qularnarsisoq,
naammagittaalliuuteqartarfimmik aaqqissuussineq maannamut atuuttoq
pissusiviusutigut atorunnaarsinneqarnersoq.

Naammagittaalliuuteqartarfiup siulittaasuata naammagittaalliornermut
pisortatut atorfinitsinneqarnissaa § 9, imm. 2-tut siunnersuutigineqartumi
erseqqissumik takuneqarsinnaammat, peqatigisaanillu Naalakkersuisut
naammagittaalliuuteqarfimmut allattoqarfimmut atugassiissasut § 9, imm. 9-
mi aalajangersagaammat qularuteqalernermit pissutaaneruvoq. Tamannalu
inatsisissatut siunnersuummi § 10, imm. 1 malillugu siulittaasup
(naammagittaalliuuteqarnermut pisortap) suliani kisimiilluni
aalajangiisinaanera kiisalu taasineri naligiitsillugit siulittaasup taasinerata
aalajangiisuunissaa imminnut sanilliukkaanni, aaqqissuussineq
pissusiviusutigut ima isikkoqalissaaq naammagittaalliuutinik suliat
amerlanersaat Namminersorlutik Oqartussani naalakkersuisoqarfiit arlaanni
aalajangerneqartassasut.

”Naammagittaalliuuteqarnermut pisortamik” taaguuteqartitsineq,
naammagittaalliuuteqarnermik suliat naammagittaalliuuteqarnermut
aqutsisoqarfimmit assigisaannilluunniit, oqartussatut namminersortutut
inissisimasunngorlugu, qitiusumillu allaffeqarfiit sinnerinut
kiffaangissuseqartunngorlugu inatsisitigut aalajangersagaasunit
suliarineqartarnissaannik ilusiliinermut eqqarsalersitsivoq. Ajornartorsiut
nutaajunnginnera KANUKOKAp tamatumunnga atatillugu
innersuussutigissavaa, naammagittaalliuuteqartarfilli isumaginnittoqarfiup
aqunneqarnera aaqqissuussaanelalu pillugit Inatsisartut peqqussutaat nr. 8, 10
oktober 1979-imeersukkut pilersinneqarmalli ajornartorsiut politikikkut
arlaleriarluni oqaluuserineqartarpoq.

Taamatut aaqqissuussinissamut siunnersuuteqarnikkut
naammagittaalliuuteqarsinnaanerup qitiusumik allaffeqarfimmi
naalakkersuisoqarfimmit kiffaangissuseqartussaanelanik oqallinneq nutaamik
pissusissamisooqqilerpoq, taamaattumik KANUKOKAp kaammattuutigaa
apeqqut sukumiilluinnartumik suliarineqaqqissasoq, tamannalu inatsisissatut
siunnersuummi imaluunniit taassuma politikikkut suliarineqarnerata nalaani
pisinnaavoq.

Suliat sinnerisa ataatsimiinnerni imaluunniit allakkatigut taasinerup kingorna
aalajangerneqartussat pissusiviusutigut tusarniaanermut immikkut
aaqqissuussisoqarsimaneranik takutitsisuunersut pillugu qaavatigut
qularuteqalersitsivoq, tamatumani naalakkersuisoqarfik
naammagittaalliuutinik suliaqartoq pisuni arlaqartuni immikkut ilisimasalinnit

marlunnit oqaaseqaatinik piniartussaalluni, pisullu ilaanni suliamut tunngasut pillugit immikkut ilisimasallit tusarniartussaalugit, aatsaallu ataavartumik "ilaasortat" marluk siulittaasumut (naammagittaalliornermut pisortamut" isumaqatigiinngikkaangata tusarniaaneq inatsinerusarpoq, taamaasilluni naalakkersuisoqarfiup pineqartut isumaat malittussaallugu.

Tamatuma saniatigut suliat Naalakkersuisunit aalajangiivigineqarsimasut naammagittaalliuuteqartarfimmut tunniunneqarsimasut pineqartillugit, taamatut ilusiliinerup siunissami naammagittaalliuuteqarfiup siullermeertumik aalajangiisunit kiffaangissuseqarnera qularutigineqalersinnaavoq.

§ 9, imm. 7

Naammagittaalliuuteqarnermik suliani pisariunerusuni suliamut tunngasunik ilisimasalinnik taasisinnaanatik peqataasussanik aggersaasinnaaneq pitsaasuvoq, taamaasiornikkut ilisimasalittut suliamullu tunngasutigut eqqornerusumik aalajangiinissaq qulakkeerneqassammat.

§ 10, imm. 4.

Ilaasortat allakkatigut inassuteqarnerisigut aalajangiisoqarnissaanik siulittaasup aalajangiisinnaanera pitsaasuvoq, ilaasortalli ataatsip tamatuminnga qinnuteqarneratigut naammagittaalliummik suliap ataatsimiinnermi suliarineqarnissaa peqatigisaanik periarfissaalluni. Aalajangiinissamut allakkatigut inassuteqaatit atorneqarneranni, qarasaasianit susassaqaanngitsunit atuarneqarsinnaajunnaarsimanissaat soorunami piumasagaataassaaq.

§ 11, imm. 2 aamma 3

Isumaginninnermi Naammagittaalliuuteqartarfiup suliani allagaatit kommuninit Naalakkersuisunilluunniit piniassavai. Naammagittaalliuutit kommuninit Naalakkersuisunilluunniit tiguneqarneraniit suliami allagaatit Isumaginninnermi Naammagittaalliuuteqartarfimmut kingusinnerpaamik sapaatit akunnerisa qaangiunneranni nassiuunneqassapput. Sapaatit akunnerinik sisamanik piffissaliineq kommuninit Naalakkersuisunilluunniit qaangerneqassappat, Isumaginninnermi Naammagittaalliuuteqartarfik tunngavissat pigineqartut tunngavigalugit aalajangiisinnaavoq, tamanna naammagittaalliuuteqartumut iluaqutaappat.

Oqaaseqaatini allassimavoq pingaartumik suliat pisortanit ikiorsiissutitut, siusinaartumik pensjonisianut utoqqalinermilu pensjonisianut tunngasut naatsorsueqqissaarnikkut misissuiffigineranni paasineqartoq suliani allagaatit oqartussanit siullermeertumik suliarinnittunit piniarneranniit agguaqatigiissillugu ullut 130-150-it ingerlasartut, tamannalu Isumaginninnermi Naammagittaalliuuteqartarfimmi sulianik suliarinninnerup naammaginanngitsumik sivisuallaarneranik kinguneqarsimasoq.

Naammagittaalliuutip kommuninit Naalakkersuisuniillu tiguneqarneraniit suliami allagaatit kingusinnerpaamik sapaatit akunnerisa sisamat qaangiunneranni Isumaginninnermi Naammagittaalliuuteqartarfimmut nassiunneqarsimasariaqarnerat KANUKOKAp isumaqatigaa. Tunngavilersuutit amigaataanerat, illuatungaasumik tusarniagaqannginneq imaluunniit suliami paasissutissat naammattut pissarsiarineqarsimannginnerat sulianik suliarinninnermi kukkunernut pissutaasinnaanerat KANUKOKAp ilisimaaraa. Isumaginninnermi Naammagittaalliuuteqartarfik naammagittaalliuutitigut aalajangiisartuunermigut suliassaqaarfiiit sorliit ajornartorsiuteqarfuerannik imaluunniit inatsisunik isumasiuinnermi sumi nalinginnaasumik ajornartorsiuteqartarneranik pissusissamisoortumik ilisimasaqartuuvoq. Kommunit najukkaniluunniit immikkoortoqaarfiiit sorliit sulianik suliarinninnermi ingerlalluarfiunngitsut naammagittaalliuuteqartarfiup aamma ilisimasaqarfigaa. Taamaattumik suleriaatsimik nunamut tamarmut atuuttumik aalajangersaasoqarnissaa Isumaginninnermi Naammagittaalliuuteqartarfiup qulakkeerinninnissaa pissusissamisuuginnartutut isikkoqarpoq, taamaasilluni innuttaasut suliassiisutaat assigiiarnerusumik suliarineqarsinnaassammata. Immersugassat tamanut atugassiat aallaavittulluunniit atugassiat, suliat suliarisinnaanerannut paasissutissanik pingaaruteqartunik sunik pisariaqartitsisoqarneranik nassuiaatitallit pitsaassapput, taamaasilluni aalajangiinissamut tunngavissat erseqqinnerulissammata.

Kommunini ilinniarsimasunut kommuninilu politikerinut pikkorissarnissamut neqerooruteqarnermi saniatigut, Isumaginninnermi Naammagittaalliuuteqartarfik soorlu aalajangiinerup qanoq erseqqissumik paatsuugassaannngitsumillu allanneqarsinnaanera pillugu ilitsersuutit aalajangersimasunik tunniussaqaarsinnaavoq, taamaasilluni naliliinermut aalajangiinermullu suut tunngavigineqarsimanersut innuttaasup qularutigissanngimmagu. Illuatungeriinni attuumassuteqartuni suliap suliarineranut piffissap sivikillisinneranut ilitsersuutit aalajangersimasut tapertaasinnaapput.

Isumaginnittoqarfiup aquneqarnera aaqqissussaanelu pillugit peqqussutit allannngortinneqarnissaa pillugu Inatsisartut inatsisaat nr. 14, 16. juni 2016-meersumi (Isumaginninnermi malittarisassanik kommunit aqutsinerannik atorunnaarsitsineq)

§ 7b, imm. 2-mi aalajangersagaq tulliuuttoq ilanngunneqarsimavoq:

"§ 7 a malillugu atorunnaarsitsinissaq pillugu aalajangernermi, kommunalbestyrelsip isumaginninnikkut oqartussaaffi tamakkiisut ilaannakortulluunniit Naalakkersuisunit isumagissanngortinneqarsinnaapput. Tamatuma saniatigut Naalakkersuisut isumaginnikkut maleruagassat naaperorlugit suliasat tigullugillu aallartissinnaallugit."

Soorlu KANUKOKAp aamma inatsisissatut siunnersuummi nalinginnaasumik oqaaseqaatinut oqaaseqaatimi ataannut allakkaa nakkutilleeriaatsimik marluinnik periusitalimmik ataqatigiissaagaanngitsumilli eqqussisoqarpat, tamanna annertuumik ajornartorsiutaassasoq, tamatumani suliaq sulialluunniit arlallit Naalakkersuisunit "tiguneqarsinnaassallutik".

Ajornartorsiut inatsisissatut siunnersuummik matuminnga qaangerniarneqartoq eqqarsaatigalugu, Isumaginnittoqarfiup aqunneqarnera aaqqissuussaanelu pilluigt Inatsisartut peqqussutaata allanngortinnerarneranik Inatsisartut inatsisaat nr. 14, 6. juni 2016-imeersup saniatigut kommunit aqunneqarnerat pillugu Inatsisaat nr. 22, 18. november 2010-meersoq malillugu kinguneqartitsinissamut sakkussaqaareerpoq, soorlu aamma innuttaasup kommuni isumaginninnermik suliani sulianik suliarinninnermut aporfiliisoq akerleralugu eqqartuussivitsigut akiliuteqarani suliasisinnarneranik Inatsisartut Ombudsmandiata inassuteqaatigisinnaga.

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarnissaa pillugu Inatsisartut inatsisissaattut nr. 14, 6. juni 2016-imeersumut siunnersuutip tusarniaassutigineranut atatillugu KANUKOKAp oqaaseqaatini kiisalu Kommuni Kujallermiit tusarniaanermut akissummi ilassutaasumik oqaaseqaatit innersuussutigai.

Naammagittaalliuuteqartarfiup pisortat ingerlatsinerat pillugu inatsisini misissuinnermut tunngaviit tunngaviulluinnartut avaqqussinnaassappagit KANUKOKAp tamanna annertuumik eqqarsarnatutut isigissavai, taakku malillugit suliat aatsaat aalajangiivigineqarsinnaapput oqartussani aalajangiisussani suliap aalajangiivinissaanut tunngavissat illersorneqarsinnaasut pissarsiarineqareerpata,

Kattuffiup isumaa malillugu tamanna taamungaannaq kukkusimillu aalajngiinernik kinguneqarsinnaavoq, kommuninut innuttaasunullu ajoqutaasumik, nunalu tamakkerlugu assigiaartumik allaffissornikkut ingerlatsinissamut iluaqutaasinnaassanani.

Inatsisissatut siunnersuummi § 2 – atuutilerfia

Sulianut naammagittaalliuuteqartarfiimmuut
naammagittaalliuutigineqareersunut inatsisississalli ullormi atuutilerfiani

naammassillugit sulii suliarineqanngitsunut inatsisissatut siunnersuummi
sulianik suliarinninnermut maleruagassat atuukkumaarnerat siunniussaanerata
isummerfiginissaa KANUKOKAp ujartorpaa.

Inussiarnersumik inuulluaqqusillunga

Mikael Mikkelsen
Siunnersorti avataaneersoq
(ats)

Simon Simonsen
Siulittaasoq
sinnerlugu



**Isumaginnittoqarfiup aqunneqarnera aaqqissuussaanelu pillugit
Inatsisartut peqqussutaat nr. 11, 12. november 2001-meersup
allangortinneqarnissaa pillugu Inatsisartut inatsisissaattut siunnersuutip
tusarniaassutigineqarnerani KANUKOKAp akissutaanut akissut**

04-10-2017
Sags nr. 2017 - 16101
Akt. id. 6316392

Naak tusarniaanermut akissut 14. august 2017-imi ullulernerqarsimagaluartoq, taassuma mailikkut Immikkoortoqarfimmi pisortamit Kirsten Olesenimit aatsaat ulloq 15. august 2017, nal. 14.52 tiguneqarsimanera siullertut oqaatigineqassaaq. Tusarniaanermut akissutit nassiunneqarnissaannut 14. august 2017-imi nalunaaqqutaq 14.00 killiliussaavoq. Taamaasilluni tusarniaanermut akissut inatsisissatut siunnersuummut tamatumunngalu oqaaseqaatinut ilanngullugu suliarineqarnissaanut kingusinaartumik pissiarsiarineqarsimalluni.

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iniian@nanoq.gl
www.naalakkersuisut.gl

Tusarniaanermi akissutini KANUKOKAp oqaaseqaataanut tulliuuttut itisilerissutaasumik oqaaseqaataapput

A. Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersoq

Naammagittaalliutit tunniunneqartut qanoq iluseqartinnissaannut maanna piomasaaqateqartoqanngilaq. Inatsisissatut siunersuut suleriaaseq digitaliusoq pillugu maleruagassanik aalajangersaanissamat tunngavissiivoq. Digitalinngortitsineq taanna Pisortani Digitalimik Allakkerineq pillugu Inatsisartut inatsisaat naapertorlugu suliarineqassaaq. Innuttaasut naammagittaalliummik digitalimik tunniussisinnaanngitsut imaluunniit periarfissaqanngitsut soorunami eqqarsaatigineqassapput. Innuttaasut taakku naammagittaalliutit allatut ilusilikkanik sulit tunniussisinnaajuassapput.

B. Nutaamik suliarineqartussanngortitsilluni angerlamut nassiusseqqinneq
Tunngaviit pigineqartut tunngavigalugit aalajangiisoqarsinnaanera § 11, imm. 3-miikkunnaarpoq.

Aalajangiineq sulianik suliarinnineq pillugu inatsimmi piomasaaqatinik eqqortitsinngippat, taamatut aalajangiineq suliarineqaqqittussanngorlugu angerlamut nassiateqqinneqarsinnaavoq, sulianik suliarinninnermut inatsimmi maleruagassanik eqqortitsisunngortinniarlugu.

C. Kommuni allagaatinik pisariaqartinneqartunik nassiussisimangippat, naammagittaalliuuteqartarfiup naammagittaallioortumut iluaqutaasumik aalajangiisinaanera eqqarsaatigigaanni, naammagittaalliuutit qanoq iluseqarnissaannut piumasaqaatinut tulluartikkuminaappoq

§ 11, imm. 3-mi aalajangersagaq iluarsartuuteqqinneqarpoq, taamaasilluni tunngaviit pigineqartut tunngavigalugit aalajangiisoqarsinnaajunnaaluni, tamanna naammagittaallioortumut iluaqutaasussaagaluarpalluunniit.

D. Siullermeerummik suliarinnittumut aalajangiisimasumut inatsisitigut tunngavissaq erseqqissoq amigaataappat, suliarlu qaqqeqqinneqarsinnaappat qaqqeqqittariaqarpalluunniit, suliamik siullermeerummik suliarinnittoq suliami nutaamik aalajangiinissamut inatsisitigut tunngavissaqanngilaq

Suliamik suliarinninnermi kukkusoaqarsimappat, imaluunniit paasisutissanik nutaanik, suliap inerneranik allannguisinnaasunik takkuttoqarpat, oqartussat namminneq suliniutigisaminnik inatsisinillu immikkuullarissunik tunngaveqaratik suliamik nutaamik suliarinnittussanngorlutik qaqqitseqqissinnaanerata pisortat ingerlatsinerannut inatsisini tunngaviuvoq nalinginnaasumik akuerisaasoq. Tamatuma saniatigut suleriaatsimik allannguinneq aalajangiinerit eqqortuujunnaarnerannik kinguneqarsimappat, oqartussat namminneq suliniutigisaminnik suliamik suliarinneqqilersinnaapput.

Pisortat Ingerlatsinerannut Inatsisit – Sulianik Suliarinninneq – Jens Garde allallu, arfinilissaanik naqqeqqitami, qupp. 140-mi tamanna takuneqarsinnaavoq, assigisaanillu Østre Landsretip eqqartuussutaani 8. januar 2014-imeersumi (B1649005) takuneqarsinnaalluni.

E. Isumaginninnermi Naammagittaalliuuteqartarfiup aalajangiinerinik eqqartuussivitsigut misiliineq

Eqqartuussisarneq pillugu inatsimmi § 57, imm. 1 naalackersuisoqarfiup atuaqqereerlugu nalilerpaa inatsit malillugu sulianut tamanut Kalaallit Nunaanni Eqqartuussivik siullermeerinnittut suliarinnittuusariaqartoq. Tamanna ataatsimiititaliap akuerisinnaappagu, ataatsimiititaliami suliarineqarneranut atatillugu isumaliutissiisummi allannguutissat siunnersuummik saqqummiussisoqarnissaa siunnersuutigineqassaaq, taamaasilluni aalajangersagaq eqqartuussisarneq pillugu inatsimmi aalajangersakkanut naleqqussarneqarsinnaassammat.

F. § 9-mut nalinginnaat

Sulianik piareersaaneq Isumaginninnermi Naammagittaalliuuteqartarfiup allattoqarfiata ingerlaqqittumik suliarisartussaavaa. Suliamik suliarinninneq pillugu allattoqarfik naalackersuisoqarfimmit ilitsersorneqarnissamut kiffaanngissuseqarpoq, taamaattumik pineqartut taakku marluk erseqqivissumik suli avissaarsimatinneqarput.

*G. § 9-mut nalinginnaat – naammagittaalliuuteqartarfiup
aaqqissuussaana*

Aaqqissuussaanaermut tunngavik naammagittaalliuuteqarfimmut tunuliaqutaasooq aallaavittut allanngortinneqassanngilaq. Suli siulittaasooqassaaq marlunnillu ilaasortaqluni aalajangiisartussanik. Maanna siulittaasooqarpoq sisamanillu ilaasortaqluni. Sulianik suliarinninnerup eqaannerusunngortinnissaa qulakkeerniarlugu ilaasortat ikilisinneqassapput, aalajangiinnermut suleriaaseqarnerup sukkanerusunngortinnissaanut iluaqutaasumik. Suliani pisariunngitsuni tamani siulittaasooq aalajangiisuusassaaq, sulianilu tunngaviumik suliassatut isikkoqartuni ilaasortat marluk aggersarneqartassapput. Taamaasilluni naammagittaalliuuteqartarfiup aaqqissuussaanaeranik atorunnaarsitsineq pineqanngilaq, inuiaqatigiinnili ineriartornerup malitsigisaanik suleriaatsip angusaqarfiunerusunngortinnera pitsanngorsarneralu taamaallaat pineqarlutik. Pitsanngorsaanermi Isumaginninnermi Naammagittaalliuuteqartarfiup taassumaluunniit allattoqarfiata kiffaanngissuseqarnerat allannguiffiqineqanngillat. Kiffaanngissuseqarnerat ilumut qulakkeerniarlugu allattoqarfik aamma naammagittaalliuuteqartarfik aaqqissuussaanaikkut naalakkersuisoqarfimmi allami, naalakkersuisoqarfimmit inatsisiliortumit allaanerusumi inissinneqarsimapput.

H. § 11, imm. 2 aamma 3

Innuttaasut pillugit suliassat kommunini assigiiaartumik suliarineqarnissaannut ilinniartitsineq, paasisitsiniaaneq qulakkeerrinnerlu Isumaginninnermi Naammagittaalliuuteqartarfiup taassumaluunniit allattoqarfiata suliassarinnngilai. Taakku Isumaginninnermut Aqutsisoqarfiup ataaniipput.

Naammagittaalliuutinik suliart suliarineqartarnerisa assigiissaarneqarnissaat eqqarsaatigalugu, ullumikkut naammagittaalliuuteqarnermut immersugassat assigiissaagaasut pigineqareerput. Isumaginninnermulli Naammagittaalliuuteqarfiup immersugassanik amerlanerusunik sulianik suliarinninnermut atorneqartussanik ineriartortitsinissaaq annertuumik ammaffigaa.

Kommuninut allagaatinik piniarnermi immersugassanik nassiussisoqartareerpoq, suliani assigiinngitsuni suliamut allagaatit qanoq ittut kommunit nassiuttussaanaeraat paasisutissiissutigineqartarluni.

Inatsisartut inatsisaat nr. 14, 6. juni 2016-imeersup kinguneranik allannguutit allannguutissatut siunnersuutip matuma imarisaanut attuumassuteqanngillaq. 2016-imi allannguinerup kingorna sulianik tigusineq innuttaasut Isumaginninnermi Naammagittaalliuuteqartarfimmut naammagittaaliorsinnaanerannik, imaluunniit allattoqarfiup suliamik qanoq suliarinninneranik allannguinnngilaq.

I. Atuutilersinneqarnera

Inatsisissatut siunnersuutip maanna ilusaa ullormi atuutilerfigisinneqarfigisaani sulianut ingerlasunut tamanut atuuppoq.



04-10-2017
Sags nr. 2017 - 16101
Akt. id. 6316863

Partiit oqaaseqartuisa oqaaseqaataanni apeqqutinut akissutit

Siumut

Naammagittaalliuuteqartarfimmi ilaasortat ikilinerat

Naammagittaalliuuteqartarfimmi ilaasortat ikilineqassapput ataatsimiinnerit naammassisaqarfiuneroqqullugit. Inuit ikinnerusut ataatsimiittariaqartillugit, naammagittaalliuuteqartarfik akulikinnerusumik ataatsimiittarnissamut periarfissaqalissaaq. Naammagittaalliuuteqartarfimmik allaffissornikkut aqutsineq eqaannerulersinneqassaaq kiisalu naammagittaalliuuteqartarfimmi ilaasortat isumaginninnermut tunngasunik ilisimasaqarnissaasa qulakkeerneratigut, suliamut tunngasutigut pitsaassuseq attatiinneqassaaq, naak ilaasortat ikilisinneqaraluartut.

Ilaasortanik ikilisisineq naammagittaalliuuteqartarfimmi ilaasortat angalaneranut aningaasartuutit assigisaanik ikilinerannik kinguneqassaaq.

Tamatuma saniatigut allakkatigut taasisinnaatitaanikkut aalajangiinissamut suleriaaseq innuttaasunut iluaqutaasumik eqaallisarneqassaaq.

Inatsisilerinermi kandidatit soraarummeersimanissap piumasqaataanera

Isumaginninnermi inatsisit malillugit aalajangiinerit nassuiarneqartariaqartarput, taamaattumik naammagittaalliuuteqartarfimmi ilaasortat marluk inatsisilerituutut ilinniagaqarsimanissaat iluaqutaasussaavoq. Taamatut iliornikkut allattoqarfimmi naammagittaalliuuteqartarfimmik sullissisuinnaanngitsumi naammagittaalliuuteqartarfimmili ilaasortat akornanni suliamut attuumassuteqartumik tunngaveqarnissaaq qulakkeerneqassaaq. Suliani pisariusuni tunngaviusunilu naammagittaalliuuteqartarfimmi ilaasortat tamarmiusut katersuutsillugit, naammagittaalliuuteqartarfiup inatsisilerinermi inatsisitigut suliamut tunngasutigut ilisimasaqarnissaa iluaqutaasussaavoq, taamaasilluni suliat sukimiisumik naammassisaqarfiulluarmillu aalajangiivigineqarsinnaassammata.

Naammagittaalliuuteqartarfimmi ilaasortat pingajuat isumaginninnermi ilinniakkanik paasisimasaqartuussaaq, iluaqutissalimmillu inunnik

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iniiian@nanoq.gl
www.naalakkersuisut.gl

siunnersortaasinnaavoq. Taamatut iliornikkut naammagittaalliuuteqartarfimmi ilaasortat assigiinngiaarnissaat qulakkeerreqassaaq, taamaasilluni aalajangiinerni pissutsit inatsisilerinnermut tunngasut kiisalu isumaginninnermut tunngasut tamamik qitiutinneqarnissaat qitiutinneqartussaassalluni.

Isumaginninnermi Naammagittaalliuuteqartarfimmut allattoqarfik inuiaqatigiinni pissutsinik annertuumik ilisimasaqarfiusimavoq sulilu ilisimasaqarfiussalluni, ilisimasaallu ataavartumik nutarterneqartartusaapput, ilaatigut kommuninik suleqatiginnilluarnikkut.

Tusarniaaneq

Siunnersuut ulloq 22. junimiit 14. august 2017-imut tusarniaassutigineqarpoq.

KANUKOKAp tusarniaanermut akissutaa ilanngullugu ataatsimiititaliamut nassiunneqarpoq, taamaalilluni ataatsimiititaliami suliarinninnermut ilaatinneqarsinnaassammatt. KANUKOKAp tusarniaanermut akissutaa 15. august 2017-imi nassiunneqarpoq, piffissaliussap naanerata kingorna.

Siusinaartumik pensionisiat pillugit naammagittaalliuuteqartarfik:

Siusinaartumik pensionisiat pillugit naammagittaalliuuteqartarfimmi ilaasortat Naalakkersuisunit toqqagaasarpur. Aqutsisoqarfik ilaasortatut toqqagaasinnaasunik maanna ujarlerpoq. Taakku inuttassarsineqareeripata Naalakkersuisunut saqqummiussassaaq suliarineqassaaq, tamatumalu kingorna naammagittaalliuuteqartarfik pisortatigoortumik inuttalersorneqarsinnaassalluni.

Maannakkorpiaq suliat tallimat missaanniittut Siusinaartumik Pensionisiaqarneq pillugu Naammagittaalliuuteqartarfimmi suliarineqarnissamut utaqqinneqarput.

Allagaatinik nassiussineq

Isumaginninnermi Naammagittaalliuuteqartarfiup suliami allagaatit suliap siullermeertumik suliarineqarfiani oqaatsit atornerqartut atorlugit pissarsiarisarpai. Taamaattumik suliami allagaatit kalaallisut allagaasut tamatigut nassiunneqarsinnaasarpur. E-mail atorlugu nassiussisoqarajuttarpoq. Tamatuma kingorna allagaatit Naalakkersuisut nutserisoqarfianni pisariaqartillugu nutserneqartarput.

Kommunit ingerlatsinerminnik qanoq aaqjissuussinerat Isumaginninnermi Naammagittaalliuuteqartarfiup taassumaluunniit allattoqarfiata sunniuteqarfiginngilaa. Taamaattumik kina suliami allagaatinik Isumaginninnermit Naammagittaalliuuteqartarfimmut nassiussisuussanersoq kommunit nammineerlutik aalajangertarpaat. Taamaattumik inatsisissatut siunnersuut apeqqutaatinnagu kommunit allagaatinik Isumaginninnermi Naammagittaalliuuteqartarfimmut nassiussinnermut maannamut suleriaatsiminnik attassiinnarnissat naatsorsuutigineqarpoq.

Isumaginninnermi Naammagittaalliuuteqartarfiup allatseqarfiani sulisoq suliame allagaatinik pissarsiniarluni kommuninut ataasiakkaanut angalasassappat, tamanna aningaasatigut atugassarititaasunik annertoqisunik piumasqaateqarfiussaaq.

Sulisunut piffinnut tamanut angalasartussanut aningaasarsiatigut aningaasartuuteqartoqassaaq, tamatuma saniatigut angalanermut aningaasartuutit ilanngunneqassapput, kiisalu sulisut pineqartut suliame allagaatinik pissarsiniarlutik angalaneranni sulisunik/taartaagallartunik sulianik suliarinninnermik isumaginnittussanik atorfinitsitsinnermut aningaasarsianut aningaasartuutit ilanngunneqartussaallutik.

Allaat Atuisoqarnermut Unammilleqatigiinnermullu aqutsisoqarfimmi sulisut aallartinneqartillugit, kommunini sulianik suliarinnittut suliame allagaatinik takusaqarsinnaapput, nalunagulu taakku sumi toqqortarineqarnerisut. Tamanna Isumaginninnermi Naammagittaalliuuteqartarfiup allattoqarfiani atorfillip ikiuuffigisinnaassanngilaa.

Tamatuma saniatigut sulianik suliarinnittut Isumaginninnermi Naammagittaalliuuteqartarfiup allattoqarfiani sulianik suliarinnittussaasut kommunit naalakkersuisoqarfiulluunniit allagaateqarfiani paasissutissanik nammineerlutik pissarsiniarsinissaat ajornartorsiutaassaaq. Isumaginninnermi Naammagittaalliuuteqartarfiup kiffaanngissuseqartuuneranik pisortat ingerlatsinerannut inatsiseqarnermi tunngaviusunut tamanna akerliussaaq. Allagaatit kommunini ataasiakkaani pissarsiariniarneranni allattoqarfimmi sulianik suliarinnittut peqataappata, kiffaanngissuseqarneq attatiinnarneqarsinnaanngilaq.

Naammagittaalliuuteqartarfik arlaannaannulluunniit attuumassuteqanngitsoq qulakkeerniarlugu, naammagittaalliuuteqartarfik taassumaluunniit allattoqarfia kommunini sulianik suliarinninnermut assigisaannulluunniit peqataasinnaassanngillat.

Partii Naleraq:

§ 9, imm. 5 – isumaginninnermut tunngasunik ilisimasaqarneq:

Naammagittaalliuuteqartarfiimmi assigiinngiaassuseqarnissaq qulakkeerniarlugu ilaasortamut isumaginninnermi ilinniakkatigut ilisimasaqartussamut ilinniakkatigut tunuliaqutaasussanut piumasqaatit pillugit oqaasertaliisoqanngilaq. Isumaginninnermut tunngasuni ilinniakkatigut ilisimasaqarnissamut aalajangersimasumik ilinniagaqarsimanissamik piumasqaateqarnikkut inuit naammagittaalliuuteqarfimmi ilaasortanngornissamut piginnaaneqartut mattunneqarsinnaapput. Ilaasortanik toqqaanermi isumaginninnermut tunngasutigut ilimasaqassutsip qanoq qaffasitsiginera tamatigut pingaartinneqartussaavoq, kiisalu attuumassuteqartumik ilinniagaqarsimaneq, soorlu inunnik siunnersortitut assigisaanilluunniit ilinniagaqarsimaneq naammagittaalliuuteqartarfiimmi ilaasortassanik naliliinnermi tamatigut pitsaasumik naliliinnermut ilaasarumaartut.

Naammagittaalliuuteqarnermut ilitsersuut

Siunnersuummi § 9, imm. 8-kkut Naalakkersuisut nalunaarummik suliarinninnissamut periarfissinneqarput, naammagittaalliornermik suliat qanoq iluseqarnissaannut piumasaqaatit tassani aalajangersarneqarsinnaallutik. Immersugassanik tamanit atorneqarsinnaasunik, kommunit ataasiakkaat innuttaasunik sullissinerminni atorsinnaasaannik suliarinninnissaq Naalakkersuisut kissaatigaat.

Demokraatit:

Isumaginninnermi Naammagittaalliuuteqartarfiup tusarniaanermut akissutaa

Isumaginninnermi Naammagittaalliuuteqartarfik siunnersuutip immikkoortuinut amerlaqisunut isumaqataanngilaq, ilaatigut naammagittaalliuuteqartarfiup namminermi taassumalu inuttalersugaanerata allanngortinneqarnissaat kissaatigineqarmat.

Aammattaaq tusarniaanermut akissutip Isumaginninnermi Naammagittaalliuuteqartarfimmit namminermit, taamaasillunilu naammagittaalliuuteqarfimmi ilaasortanit naammagittaalliuuteqarfiup ullumikkut inuttarisaanit suliarineqarsimanera erseqqissaatigineqassaaq.

Isumaginninnermi Naammagittaalliuuteqartarfiup kiisalu allattoqarfiup naammagittaalliuuteqartarfimmik namminermik sullissisup immikkoortinneqarnissaat pingaaruteqarpoq.

Misilittakkat tunuliaqutaralugit paasinarsivoq Isumaginninnermi Naammagittaalliuuteqartarfik suli pitsaanerulersinneqasinnaasoq, tamatumunngali maanna inuttalersugaanerata arlalitsigut allannguuteqartinnissaa piumasaqaataavoq.

Naalakkersuisut isumaqarput siunnersuut innuttaasunut iluaqutaassasoq, tamannalu pillugu oqaaseqaatini kiisalu tusarniaanermut akissutit suliarineqarneranni, ilanngullugu aamma Isumaginninnermi Naammagittaalliuuteqartarfiup tusarniaanermut akissutaata suliarineqarnerani sukumiisumik tunngavilersuuteqarsimallutik.